

Script of Evening Gojri News Bulletin 14 August 2024 at 1700 Hrs

ایوننگ گو جری نیوز بلیٹن مورخہ 14 اگست 2024

یوہ آکا شوانی جموں ہے عبدالرحمن شاہین تے عبید الرحمان تین خبر سُنو۔ پہلاں خاص خاص خبر۔

* 1۔ ضلع ڈوڈہ غے اندر فوج تے دہشت گرداں بشکار چل ریا ٹاکرا مانہ 1 فوجی کیپٹن شہید ہو گیو ہے جد کہ 4 دہشت گرداں غی ہلاکت غی امید کی جا رہی ہے۔
* 2۔ وزیر اعظم نریندر مو دی یوم آزادی غا موقعہ و ر دہلی غا لال قلعہ تین مُلک غی قیا دت کریں گا۔

* 3۔ سرکار نے 78 واں یوم آزادی تقریبات غا سلسلہ مانہ مُلک غا تقریباً 6 ہزار معزز مہماناں نانہ لال قلعہ غے اندر مدعو کیو ہے۔

* 4۔ عالمی با یو انڈیا 2024 تقریبات 12 ستمبر تین 14 ستمبر تک نوی دہلی مانہ منعقد کرائی جائے گی۔

خبراں غی تفصیل نال پہلاں عبدالرحمن شاہین۔

Encounter Assar

ضلع ڈوڈہ غا اونچا علاقہ مانہ فوج تے دہشت گرداں بشکار چل ریا ٹاکرا غے دوران 1 فوجی کیپٹن شہید ہو گیو ہے۔ جد کہ 4 دہشت گرداں غی ہلاکت غی امید کی جا رہی ہے۔ آکاشوانی جموں غا نمائندہ نے خبر دتی ہے کہ گذشتہ رات شروع ہوا ٹاکرا غے دوران اک مقامی شخص زخمی ہوؤ ہے۔ جموں خطہ غے اندر یوم آزادی تین اک دن پہلا ہوا اس واقعہ غے نال حفاظتی انتظام مزید بہتر کیا گیا ہیں۔ واضح رہے کہ اک خفیہ سولمن تین بعد حفاظتی دستاں نے ضلع ڈوڈہ غا شیو گڑھ اثر علاقہ مانہ گھیرا بندی کر غے تلاشی کاروائی شروع کی جس دوران دہشت گرداں نے فوج و ر گولیباری شروع کر دتی۔ فوج نے اس گولیباری غو موثر جواب دتو۔ اس دوران فوج گو اک جوان کیپٹن دیپک سنگھ شدید طور و ر زخمی ہو گیو۔ جس نانہ فوری طور و ر علاج معالجہ خاطر آرمی ہسپتال منتقل کیو گیو۔ جت وہ زخماں غی تاب لاتاں واں دم توڑ بیٹھو۔ ٹاکرا آلی جگہ تین خون آلود 4 بستہ لین نال عہدیداراں نانہ 4 دہشت گرداں غی ہلاکت غی امید ہے۔ علاقہ تین ایم 4 کا رہائش وی ملی ہے۔ دہشت گرداں غی تلاش جا رہی ہے اور گولہ باری غو سلسلو وی آلیں نہیں رکیو ہے۔ یہ دہشت گرد اثر علاقہ مانہ دریا غے کنڈے موجو دتھا۔ اور یہ ادھم پور نال جڑیا پتئی ٹاپ علاقہ تین ضلع ڈوڈہ مانہ داخل ہوا تھا۔

Prez Address Independence Day

مُلک و قوم پلک 78 ووں یوم آزادی مناوے گی۔ وزیر اعظم جناب نریندر مو دی دہلی مانہ مشہور لال قلعہ تین یوم آزادی نانہ مناتاں واں مُلک غی سرپرستی کریںگا۔ وے قومی ترنگو لہراویں گا تے پھر لال قلعہ غی فصیل تین قوم سنگ خطاب کریںگا۔ یوم آزادی غا موقعہ و ر صدر جمہوریہ محترمہ دروپدی مُرمو اچ شام قوم سنگ خطاب کریںگی۔ صدر جمہوریہ غا خطاب نانہ شام 7 بجے آکاشوانی غا تمام قومی نیٹ ورک تے دور درشن غا سارہ چینلاں و ر بندی تے پھر انگریزی مانہ نشر کیو جائے گا۔ صدر جمہوریہ غا خطاب غا

ترجمہ نانہہ پھر علاقائی زبانان مانہہ وی نشر کیو جا ئے گو۔ آکاشوانی غی طرفوں علاقائی زبانان مانہہ یوہ ترجمو رات ساڈھا9 بجے متعلقہ علاقائی نیٹ ورکز ور نشر کیو جا ئے گو۔

PM Partition Day

آج مُلک غی تقسیم غی ہولناکیاں با رے یا دگا ری دن ہے۔ یوہ دن سن 1947 عیسوی مانہہ بھارت غی تقسیم غے دوران مصائب تے قربانیاں غی یاد نانہہ تازی کراوے۔ وزیراعظم جناب نریندرمو دی نے اک سماجی ذرائع ابلاغ پوسٹ مانہہ اُن بے شمار لوکان نانہہ یاد کیو ہے۔ جہیڑا کہ مُلکی تقسیم غا خوف و دہشت تیں متاثر ہو غے دُکھاں تے تکلیفاں غو شکار ہوا۔ جناب مو دی نے کہیو جے یوہ ہی دن ہے جد ہم اُس وقت غا اُن متاثر ہ لوکان غی بہا دری تے اُن غی لچکدار صلاحیتاں نانہہ خراج عقیدت پیش کراں۔ اُنہاں نے کہیو جے تقسیم مُلک تیں متاثرہ افراد وچوں بہت سارا افراد نے اپنی زندگیاں نانہہ دوبا رہ بسایو تے پھر عظیم کامیابیں وی حاصل کیں۔ وزیر اعظم نے مُلک مانہہ یکجہتی تے آپسی بھائی چا رہ غا رشتہ غا تحفظ با رے مُلکی عزم نانہہ ظاہر کیو۔ واضع رہ جے مُلک غی تقسیم غے دوران اپنی جڑاں تے اُکھڑیا کہراں تے اُجڑیا تے اپنی جان گواہ بیٹھن آلا لوکان نانہہ خراج عقیدت پیش کرن غی خاطر حکومت نے سال 2021 مانہہ یوہ فیصلو لیو تھو جے ایسا لوکان غی قربانیاں و شہادتیاں نانہہ یاد کرن با رے ہر سال 14 اگست نانہہ یاد گاری دن منایو جا ئے گو۔

Prez Amrit Udyan

صدر جمہوریہ محترمہ دروپدی مُرمو نے اج راشٹر پتی بھون مانہہ امرت اُدیان سمر آنولز 2024 غو افتتاح کیو ہے۔ اس نانہہ لوکان واسطے جمعہ غا روز تیں کھول دتو جا ئے گو تے سیلانی ات 15 ستمبر تک آسکیں۔ نوجوان دماغاں مانہہ امرت اُدیان غو جذبو پیدا کرن با رے بٹن بیجز سکول غا بچاں مانہہ تقسیم کیا جائیں گا۔ ات آن آلاں نانہہ منفرد و ماحولیات دوست یاد گاری بیج کاغذات پیش کیا جائیں گا۔ اس سال پہلی بار قومی کھیڈ دن غا موقعہ ور 29 اگست نانہہ امرت اُدیان مانہہ کھیڈاں مانہہ حصو لین آلا افراد نانہہ مدعو کیو گیو ہے۔ ان غے علا وہ سکولاں تے یونیورسٹیاں تیں آساتذہ نانہہ وی کہیو گیو ہے جے وے اپنی تعریف مانہہ پُھلاں غو نظارو کریں۔ اس با رے اُدیان اُتسو ور بہت ساری نویں خصوصیات وی متعارف کروائی گئی وی ہیں۔ ات آن آلاں غی سہولت واسطے سینٹرل سیکریٹریٹ میٹرو سٹیشن تیں مفت بس خدمات وی دستیاب کروائی گئی ہیں۔ راشٹر پتی بھون غی ویب سائٹ ور ٹکٹ بُک کی جا سکیں تے امرت اُدیان واسطے داخلو مُفت ہے۔

Shah Har Ghar Tiranga

مرکزی وزیر داخلہ امت شاہ نے آج ہر گھر ترنگا مہم غا اک حصہ غا طور ور نویں دہلی مانہہ اپنی رہائش گاہ ور قومی ترنگو لہرایو۔ اک سماجی ذرائع ابلاغ پوسٹ مانہہ جناب شاہ نے کہیو ہے جے کروڑاں ہم وطنان غی یکجہتی، ایکتا، وفاداری تے فخر غی علامت غے طور یوہ ترنگو ہمیشہ لہراتو رہ گو۔ اپنی رہائش گاہ ور ترنگو لہراتاں واں وزیر داخلہ نے اُن جنگ آزادی کا جنگجووان نانہہ یاد کیو جنہاں نے مُلک غی آزادی واسطے اپنو سب کجھ قربان کر دتو۔ ہر گھر ترنگا مہم پورا مُلک مانہہ 9 تیں 15 اگست تک منعقد کی جا رہی ہے۔ تانجے شہریاں مانہہ حُب الوطنی غا جذبہ نانہہ مزید تقویت دتی جا سکے۔ اس مہم غے تحت

حکومت نے لوکاں ور زور دتو ہے جے وے اپنا کہراں ور ترنگو لہراویں تے ترنگا سنگ سیلفی لے غے اس نانہہ ہر گھر ترنگا ویب سائٹ ور چڑھاویں۔

Panchyat Workshop

نوی دہلی مانہہ پنچایتاں غے اندر خواتین رہنمائی ور قومی سطح غی ورکشاپ غو انعقاد کیو گیو ہے۔ جس مانہہ مُلک غی 160 پنچایتاں غا نمائنداں نے شرکت کی ہے۔ اس ورکشاپ نال خطاب غے دوران پڈو چری غا سابقہ لیفٹنٹ گورنر کرن بیدی نے پنچایتاں غے اندر زمینی سطح ور درپیش معاملن نانہہ اُجاگر کیو اور اُن غا موثر حل ور وی تبادلہ خیال کیو۔ اُنہاں نے کہیو کہ مُلک غی دو تہائی آبا دی گرائیاں مانہہ بسے اور سرپنچاں نانہہ اپنی ذمہ داریاں متعلق پورو علم ہونو چاہیے۔ آکاشوانی نیوز نال گل بات غے دوران منتخب پنچایتی نمائنداں نے وی اپنا تجربات سانجھا کیا۔ اُترا کھنڈ غا گرام پردھان تبسم عمران نے کہیو کہ اس ورکشاپ نال نمائنداں نانہہ کا فی رہنمائی حاصل وے گی۔ مہارا نمائندہ نے خبر دتی ہے کہ اس ورکشاپ مانہہ شرکت کرن آلا پنچایتی نمائندہ آندہ کل یوم آزادی غا موقعہ ور لال قلعہ غے اندر منعقد ہون آلی یوم آزادی تقریب مانہہ خصوصی مہماناں غی طرز ور شرکت کریں گا۔ پنچایتی راج غا مرکزی وزیر راجیو رجن سنگھ تے پنچایتی راج غا وزیر مملکت پروفیسر ایس پی سنگھ بہگل ان پنچایتی نمائنداں غی حوصلہ افزائی تے مبارکباد پیش کریں گا۔

یہ خبر تم آکا شوانی جموں تیں سن رہیا ہیں خبراں غا باقی حصہ نال عبید الرحمان۔

ID Special Guest

حکومت غی طرفوں 78 واں یوم آزادی غی تقریبات مانہہ شمولیت با رے پلک نویں دہلی مانہہ لال قلعہ ور پورا مُلک تیں کوئی 6 ہزار ممتاز مہماناں نانہہ مدعو کیو ہے۔ اس تقریب مانہہ شمولیت مُلک غا بنیا دی پہلواں مانہہ رنگا رنگی نانہہ ظاہر کرے تے مُلک غی نمایاں خدمات نانہہ اُجاگر کرتاں واں 24 بکھ بکھ زُمران غا اشخاص نانہہ دعوت دتی گئی ہے۔ وزیر اعظم کسان سمان ندھی تیں مستفید ہون آلا کُل 250 کساناں نانہہ وی خصوصی مہماناں غے طور ور مدعو کیو گیو ہے۔ جھیڑا اُن لکھاں کساناں غی نمائندگی کرینگا جنہاں غی زندگیاں مانہہ حکومت غی برائے راست آمدن حمایت نے مثبت تبدیلی آئی ہیں۔ ان غے علاوہ پردھان منتری فصل بیمہ یوجنا تیں مستفید ہون آلا 250 کسان وی یوم آزادی غی تقریب مانہہ شرکت کرینگا۔ پیداواری کسان تنظیم غا کُل 500 ممبران نانہہ وی اس تقریب مانہہ شرکت واسطے بلايو گیو ہے۔ دیہی تے پسماندہ علاقان مانہہ بنیا دی صحت سہولیات مہیا کروان با رے اہم رول ادا کرن آلی 150 آشا تے اے این ایم ورکر وی یوم آزادی غی تقریب غو حصو ویں گی۔ مقامی اداراں مانہہ خواتین غا بدھتا رول نانہہ مناتاں واں گرام پنچایتاں تیں اضافی طور 300 منتخب خواتین نمائندگان نانہہ وی اس تقریب مانہہ شرکت با رے دعوت دتی گئی ہے۔ 150 لکھ پتی دیدیز تے 150 ڈرون دیدیز نانہہ وی یوم آزادی غی تقریب مانہہ مدعو کیو گیو ہے۔ ایکلاویہ ماڈل رہا نشی اسکولاں تیں 150 طالب علم قبائلی کلاکاراں تے ون دھن ویکاس کیندر غا 100 ممبران، آنگن واڑی، سکھی کیندر، خواتین غی با اختیاریت با رے سنکپل حُب تے بچہ بہبود کمیٹی غی 100 خواتین ورکر ”میری ماٹی میرا دیش غے تحت این ایس ایس غا 400 رضاکار تے مائی بھارت اسکیم تیں مستفید ہون آلا 200 افراد وی یوم آزادی غی تقریب مانہہ حصو لے رہیا ہیں۔ پیرس اولمپکس 2024 غا ترقیبات 150 کھلاڑیاں نانہہ وی بطور خصوصی مہمان مدعو کیو گیو

بے۔ ان غے علا وہ توقعاتی بلاک پروگرام غا ہر بلاک غی نمائندگی کرن آلا کل 1 ہزار
ممبران 200 ایجاد کار و ایمر تیں طالب علم تے پی ایم شری سکیم گا 200 طالب علمان
نانہ وی یوم آزادی غی اس بڑی تقریب مانہ مدعو کیو گیو ہے۔

Jatinder Globel Bio India

عالمی بایو انڈیا 2024 تقریبات غو انعقاد نوی دہلی مانہ 12 ستمبر تیں 14 ستمبر تک وے
گو تاجے بھارت غا بایو ٹیکنالوجی شعبہ نانہ عالمی سطح ور ترقی دتی جا سکے۔ اس
تقریب غو موضوع جدت، ماحولیاتی نظام تے حیاتیاتی پیداوار رکھیو گیو ہے۔ اس تقریب
غے دوران دُنیا گا 30 ممالک تیں 5 ہزار نمائندہ شرکت کریں گا۔ نویں دہلی مانہ سائنس
تے ٹیکنالوجی غا مرکزی وزیر ڈاکٹر جنتدر سنگھ نے ذرائع ابلاغ نال گل کرتاں واں کہیو کہ
اس تقریب نال بھارتیہ بایو ٹیکنالوجی شعبہ نانہ عالمی شہرت ملے گی۔ انہاں نے کہیو کہ
سال 2014 مانہ بھارتیہ ماحولیاتی معیشت 10 بلین ڈالر تھی جہیڑی سال 2024 مانہ
137 بلین ڈالر درج کی گئی۔ اور سال 2030 تک یاہ معیشت 3 سو بلین ڈالر غی رقم نانہ پا
رکر جا ئے گی۔

Tiranga Rally Kishtwar

ضلع انتظامیہ کشتواڑ نے اک تاریخی ترنگا ریلی غو اہتمام کیو جس مانہ 10 ہزار تیں
منا اسکولی بچاں تے مقامی لوکاں نے شرکت کی۔ ڈی سی کشتواڑ ڈاکٹر دیوانش یا دو نے
اس ریلی غی قیادت کی۔ اس موقع ور بولتاں واں ڈی سی دیوانش یا دو نے اس طرح کہیو۔
پاٹ۔

EPSKN Reasi

ضلع انتظامیہ ریاسی نے شہیداں نانہ خراج عقیدت پیش کرتاں واں ضلع غے اندر ”ایک
پیڑ ماں کے نام“ شجرکاری مہم غی شروعات کی ہے۔ ڈی سی ریاسی نے شہیداں گا وارثاں،
سول انتظامیہ تے کئی اعلیٰ افسراں غے ہمراہ اس مہم غو آغاز کیو۔ اس موقع ور بولتاں
واں ڈی سی ریاسی وشیش مہاجن نے اس طرح کہیو۔۔۔ پاٹ۔

اس غے نال ہی خبراں غو یوہ بلیٹن ختم ہوؤ۔